

1283-1283- OFP - Acta Capitulum Generalium apud Montempessulanum Celebrati

In nomine patris et filii et spiritus sancti. Amen.

Acta capituli generalis apud
Montempessulanum celebrati anno Domini
· M° · CC° · LXXXIII° ·

Confirmamus has constitutiones. In capitulo de electione diffinitorum capituli provincialis et generalis. ubi dicitur. maior possit numerus inveniri. addatur. predicti igitur · iiiior · diffinitores eligantur in die proxima precedente diem assignacionis provincialis capituli. et ex tunc incipiat auctoritas eorumdem. Et hec habet · iii · capitula.

Item hanc. In capitulo de apostatis. ubi dicitur. secundum quod sue discrecioni visum fuerit. vel placitum. addatur. apostate unius conventus non recipiantur a priore alterius conventus ad ordinem in eadem provincia; sine licencia prioris provincialis. nec apostate aliarum provinciarum recipiantur in aliis provinciis; sine licencia magistri ordinis. Et hec habet · iii · capitula.

Item hanc. In capitulo de capitulo provinciali. ubi dicitur. eius excessum referant ad capitulum scripto communiter sigillato. addatur sic. singulis annis auditis culpis in capitulo provinciali fiat secretum scrutinium in conspectu omnium super retencione vel absolutione prioris provincialis. cum expressione nominum et officiorum fratrum exprimentium vota sua per diffinitores capituli provincialis. quod scrutinium non publicetur vel alicui ostendatur. sed statim sigillis omnium diffinitorum in conspectu omnium sigilletur. et per diffinitorem generalis capituli vel eius socium vel per socium prioris provincialis in anno provincialium ad generale capitulum deferatur. Et hec eadem forma scrutini facienda de priore conventuali per subpriorem vel eius vicarium in absentia subprioris et duos antiquiores in ordine de conventu presentes in capitulo in tractatu eorum. que mittenda sunt ad capitulum; observetur. Dictis autem scrutatoribus voluntatum in virtute obediencie precipimus. quod dictum scrutinium alicui per modum aliquem non revelet. Et hec habet · iii · capitula.

Iste sunt approbaciones.

Approbamus has. In capitulo de capitulo provinciali. ubi dicitur. infra vero idem tempus. deleatur. idem tempus. et dicatur. quinquennium ab ingressu ordinis fratres alii etc. Et hec habet · ii · capitula.

Item hanc. In capitulo de visitoribus. ubi dicitur. priores autem seu lectores. addatur. et subpriores. Et hec habet · ii · capitula.

Item hanc. In capitulo de electione prioris provincialis. ubi dicitur. hoc excepto quod eos includi sicut in electione magistri non oportet. addatur. tres autem priores conventuales. qui primitus habitum nostri ordinis susceperunt; disquirant. et recipiant vota fratrum. Et hec habet · ii · capitula.

Item hanc. In capitulo de capitulo provinciali. ubi dicitur. predicatorum autem generales dicimus. qui per priorem provinciam et diffinitores provincialis capituli fuerint instituti. addatur. quos instituendi nullus vicarius eciam cum diffinitoribus; habeat potestatem. Dicti autem predicatorum dicto officio non fungantur; nisi in provincia. in qua fuerint instituti. Et hec habet · ii · capitula.

Item hanc. In capitulo de recipiendis. ubi dicitur. nec conventus aliquis recipiat conversum sine licencia prioris provincialis. addatur. nec receptus fiat clericus; sine licencia magistri ordinis speciali. Et hec habet · ii · capitula.

Item hanc. In confessione generali. ubi dicitur. confiteor deo et beate Marie. addatur. et beato Dominico. Et hec habet · ii · capitula.

Iste sunt inchoaciones.

Inchoamus has. In capitulo de ieiuniis. ubi dicitur. et vigilia Iohannis Baptiste. Petri et Pauli. Iacobi. addatur. et beati Dominici patris nostri.

Item hanc. In capitulo de electione prioris provincialis. ubi dicitur. ad hoc idem electos a maiori parte conventus. addatur. per disquisitionem prioris vel gerentis vices eius et duorum fratrum. qui primitus habitum nostri ordinis susceperunt.

Item hanc. In capitulo de electione prioris provincialis. in fine addatur sic. si vero in provincialatu decesserint; libri et alia que habuerint per provisionem ordinis a provincia. antequam essent provinciales. vel eciam ab aliquo conventu; ad provinciam vel conventum pertinebunt. alia vero omnia que habuerint. sint illorum conventuum; de quibus assumpti fuerunt. ea vero que acquisierunt tempore provincialatus; ad provincias quarum erant priores spectabunt.

Item hanc. In capitulo de capitulo generali. in fine addatur. uno anno intermittatur; et sequenti anno celebretur. et quicquid contra sententiam huius constitutionis repertum fuerit in constitutionibus; per diffinitores terci sequentis capituli removeatur.

Item hanc. In capitulo de capitulo provinciali. in fine addatur. capitula provincialia uno anno intermittantur et sequenti anno celebrentur. nichilominus tamen cum in aliqua provincia capitulum generale. celebratur. simul eciam cum eodem capitulum provinciale celebretur. et quicquid contra

sententiam huius constitutionis repertum fuerit in constitutionibus; per diffinitores tercii sequentis capituli removeatur.

Item hanc. In capitulo de studentibus. ubi dicitur · iiiior · autem provincie. deleatur totum usque ibi. provideant. et dicatur sic. sex autem provincie. scilicet. Hyspania. Provincia. Lombardia. Romana provincia. Theotonia. Anglia; provideant etc.

Iste sunt admoniciones.

Admonemus et volumus. quod priores circa instructionem et informacionem fratrum iuvenum. eciam post ipsorum professionem; diligentem curam adhibeant. nec eos exponant discursibus. nec ad artes addiscendas eos exponant; nisi prius in divino officio instructi fuerint et in religione et in observanciis regularibus informati.

Item. Volumus et mandamus. quod constitucio de recipiendis noviciis arcius observetur. et in eadem etate a constitutionibus determinata; sine causa valde legitima nullatenus dispensetur. Et si aliqui de cetero aliquem infra etatem a iure taxatam receperint contra iura. vel tali recepioni consenserint cum effectu; sint privati vocibus in recepcione noviciorum. quousque per magistrum ordinis. vel per priorem suum provincialem et diffinitores capituli provincialis fuerint restituti. Et insuper priores provinciales eos. quos invenerint in hoc amplius deliquisse; privent omni voce. prout viderint expedire. et nichilominus qui circa hoc deliquerunt a tempore generalis capituli Florencie celebrati; 1 · xii · dies in pane et aqua abstineant. nisi de hoc alias specialiter sint puniti. et totidem in capitulo recipiant disciplinas.

Item. Inhibemus districte. ne fratres faciant inductiones in electionibus. et priores provinciales vel eorum vicarii inquirent de hoc diligenter. et si aliqui contra hoc fecerint de cetero; priores provinciales vel eorum vicarii. privent eos voce in omni electione per triennium. et per eosdem eciam alias acrius puniantur.

Item. Eadem districtione prohibemus. ne fratres aliquid recipiant sub secreto; quod vergat in preiudicium correctionis vel ordinis. quod si quis tale secretum receperit; ad requisicionem prelati sui illud sibi teneatur fideliter revelare.

Item. Volumus et districte iniungimus prioribus universis et eorum vicariis. quod silentium et alias observancias regulares; diligentius faciant observari. et in combinacione fratrum et maxime iuvenum; sint solliciti et intenti. ut eos associent. prout expedit. honestati et securitati ordinis; et moribus singulorum.

Item. Caveant priores cum summa diligencia. ne in domo recreacionis cum carnibus tritis vel sectis cibaria permittant aliquatenus ministrari.

Item. Quod fratres studentes per priores provinciales ad suas provincias revocati; literas sue revocacionis priori domus presentare vel denunciare sine more dispendio teneantur.

Item. Volumus. quod diligentius observetur ordinacio facta in capitulo Burdegalensi circa deposita. que talis est. in singulis conventibus tres depositarii per conventum assignentur. qui sine licencia prioris vel eius vicarii. recipiendi. ostendendi. seu reddendi deposita; non habeant potestatem. nec prior eciam vel eius vicarius; sine ipsis. quod si aliquem dictorum depositariorum abesse vel impediri contigerit; clavis eius tradatur illi. quem prior vel eius vicarius assignaverit de consilio discretorum. et caveant semper. ne unus simul teneat plures claves. preter istam autem ordinacionem; nullus frater audeat depositum aliquod recipere vel tenere².

Item. Volumus et monemus. quod priores provinciales fratribus. quos de conventu ad conventum mutant. prefigant terminum. infra quem ad assignatos sibi conventus recedere teneantur.

Item. Cum multe provincie divisionem provincialiarum petant. et usque modo a multis provinciis non potuerit modus congruus inveniri; volumus et mandamus. quatenus singuli provinciales et diffinitores. in suis provincialibus capitulis diligenter conferant et inquirent. qualiter et per quem modum sua provincia dividi possit. et modum ipsum sub sigillis provincialis et diffinitorum. scribant ad sequens capitulum generale. ut magister et diffinitores dicti capituli a singulis provinciis informati ad inchoandam constitutionem de divisione procedant. si modus potuerit congruus inveniri.

Monemus priorem provincialem Provincie et diffinitores et priores conventuales et ceteros rectores eiusdem provincie et districte eis iniungimus. quod ita se communes exhibeant et in suis diffinicionibus. correctionibus. promocionibus fratrum ita se ostendant habere communem affectum; quod nullus possit de notabili parcialitate notari. Quod si per aliquos secus factum fuerit; rogamus. quod magister ordinis sive illos a suis officiis amovendo. sive illos extra provinciam mittendo. sive instituendo in eadem provincia vicarium. vel visitatores de alia provincia destinando. vel alio modo. quo sibi videbitur; salubre remedium studeat suo tempore adhibere.

Item. Psalmus cum letania more solito dicatur.

Concedimus provincie Hyspanie · i · domum ponendam in Castella. provincie Theotonie; · ii · provincie Dacie; · i · ponendas omnes. ubi prioribus provincialibus et diffinitoribus capitulorum provincialium videbitur expedire.

Ista sunt suffragia.

Pro domino papa et statu universalis ecclesie; quilibet sacerdos · iii · missas. Pro venerabili collegio dominorum cardinalium; quilibet sacerdos · ii · missas.

Pro domino Latino Hostiensi et Veletrensi episcopo; quilibet sacerdos · ii · missas. unam de beata virgine et aliam de beato Dominico.

Absolvimus priores Pirpiniani. Brivensem. Brageriacensem. Bitterrensem. Nemausensem. Avinionensem. Alestensem. Valentinum. Massiliensem. Grassensem.

Item. Absolvimus omnes predicatores generales in duobus capitulis provincialibus immediate preteritis in provincia Provincie scilicet apud Massiliam et apud Carcassonam per diffinitores et per vicarios institutos [De praedicatoribus generalibus institutis in capitulis provincialibus provinciae Provincie celebratis Massiliae (1281) et Carcassonae (1282)].

Sententias iudicum approbamus.

Cum conventus Parisiensis debitorum onere nimium sit gravatus. rogamus priores et fratres universos. quod si eis occurrerit opportunitas ad alleviandum paupertatem illius conventus dent operam efficacem³.

Capitulum generale sequens assignamus apud Bononiam. in provincia Lombardie. Diffinitores autem veniant dominica infra octavas ascensionis.

Iste sunt penitencie.

Omnibus fratribus de provincia Provincie. qui contra ordinationem capituli generalis de priore provinciali electionem fecerunt et post cassationem electionis eundem iterato elegerunt. iniungimus · v · dies in pane et aqua.

Fratri Poncio de Caerano. qui gessit vices prioris de conventu Castrensi. et ceteris fratribus qui consenserunt ad dandam literam testimonialem ad excusationem fratris Petri Bertrandi damus · vii · dies in pane et aqua · vii · letanias ac totidem disciplinas¹.

Item. Fratribus. qui consenserunt in quamdam literam infamatoriam contra fratrem Iohannem Vigorosi · vii · dies in pane et aqua. illis vero qui primitus consenserunt et postmodum negaverunt in capitulo; iniungimus · x · dies in pane et aqua · x · disciplinas et · x · letanias².

Cum quidam fratres conversi de provincia Provincie scapularia parva deferant. que nimis alba et similia scapularibus clericorum esse videntur. districte iniungimus omnibus prioribus conventualibus et eorum vicariis. ut infra quindenam. postquam hec nostra ordinatio ad conventus eorum devenerit; dicta scapularia ab eis faciant removeri vel tingi. alioquin dicti priores et eorum vicarii una die in pane et aqua in qualibet septimana ieiunent. donec illud cum effectu duxerint ordinandum.

Concedimus magistro ordinis ordinationem studiorum generalium. etc.

Actis additae sunt litterae magistri ordinis; cf. app. n. XXXV.